

आकाशवाणी रायपुर (छत्तीसगढ़)
प्रादेशिक समाचार (छत्तीसगढ़ी)

1810 मंगलवार

01.10.2024

प्रमुख समाचार –

- 1— प्रधानमंत्री नरेन्द्र मोदी जनजातीय बहुल गांव के समग्र विकास बर काली दू अक्टूबर के “धरती आबा जनजातीय ग्राम उत्कर्ष अभियान” के झाखंड के हजारीबाग ले सुरुवात करही।
- 2— मुख्यमंत्री ह भगवान बिरसा मुण्डा के जयंती के मउका म पन्द्रह नवंबर के प्रदेश के हरेक जिला म ‘जनजातीय गौरव दिवस’ मनाय के घोसना करीन।
- 3— मुख्यमंत्री ह अंतर्राष्ट्रीय वृद्धजन दिवस के मउका म सूरजपुर म सियान सम्मान कार्यक्रम म सामिल होइन—एक सौ सत्यासी करोड़ रुपिया ले जादा के आने—आने विकास काम के भूमिपूजन अउ सिलान्यास करीन।

प्रधानमंत्री—जनजातीय ग्राम उत्कर्ष अभियान

प्रधानमंत्री नरेन्द्र मोदी जनजातीय बहुल गांव के समग्र विकास बर काली दू अक्टूबर के “धरती आबा जनजातीय ग्राम उत्कर्ष अभियान” के झाखंड के हजारीबाग ले सुरुवात करही। ए मउका म छत्तीसगढ़ के बलरामपुर—रामानुजगंज जिला के राजपुर म राज्य स्तरीय कार्यक्रम आयोजित करे जाही, जेमा मुख्यमंत्री विष्णुदेव साय सामिल होही। जिला प्रसासन डहार ले प्रधानमंत्री के कार्यक्रम के सीधा प्रसारण देखाय के व्यवस्था विकासखंड राजपुर के सासकीय हायर सेंकेंडरी स्कूल ग्राउंड बूढ़ा बगीचा म करे गोहे।

पीएम जन—मन मेगा इवेंट

प्रधानमंत्री नरेन्द्र मोदी काली दू अक्टूबर के गांधी जयंती के मउका म झारखंड के हजारीबाग म “पीएम जन—मन मेगा इवेंट” म हितग्राही मन ले संवाद करही। ए कारीकरम म सामिल होय बर जशपुर जिला के बगीचा विकासखंड के कुटमा गांव के रहइया लखपति दीदी मनकुंवारी बाई ल नेवता दे गो हवय। ए दउरान प्रधानमंत्री विशेष पिछड़ा जनजाति पहाड़ी कोरवा समुदाय के मनकुंवारी बाई ले घलो गोठबात करही। मनकुंवारी बाई काली हजारीबाग बर निकलीन हे।

खबर के मुताबिक मनकुंवारी बाई खेती—किसानी के संगेच बत्तख पालन अउ तेंदूपत्ता, महुआ, चिरौंजी अउ साल बीजा संग्रहण अउ बिक्री के काम करत हे। ओमन ह हर बछर दू लाख सत्तार हजार रुपिया कमा के लखपति दीदी बन गो हवय।

मुख्यमंत्री—जनजातीय गौरव दिवस

मुख्यमंत्री विष्णुदेव साय ह भगवान बिरसा मुण्डा के जयंती के मउका म पन्द्रह नवंबर के प्रदेश के हरेक जिला म ‘जनजातीय गौरव दिवस’ मनाय के घोसना करीन हे। मुख्यमंत्री आज रईपुर म ‘जनजातीय समाज के गौरवशाली अतीत, ऐतिहासिक, सामाजिक अउ आध्यात्मिक योगदान बिसय उपर राखे गो एक दिन के कार्यशाला म बोलत रिहीन। ए दउरान मुख्यमंत्री ह किहीन कि जनजातीय समाज के इतिहास गौरवशाली रहे हे। सहीद वीरनारायण सिंह, गेंदसिंह, गुण्डाधूर जइसन कतकोन महान नायक मन ह अपन बलिदान दीन हे। मुख्यमंत्री ह बतईन कि प्रधानमंत्री नरेन्द्र मोदी काली हजारीबाग ले प्रधानमंत्री जनजाति उन्नत ग्राम अभियान के सुरुआत

करही, जेखर ले जनजाति बाहुल्य तिरसठ हजार गांव के पांच करोड़ ले जादा मनखे लाभान्वित होही। ओमन किहीन कि उच्च शिक्षा विभाग डहार ले होवत ए कार्यशाला जनजाति समाज के गौरव ल पूरा समाज के आगू लाय म मील के पत्थर साबित होही।

कार्यक्रम के अध्यक्षता म वन मंत्री केदार कश्यप ह करीन। उहें, विधायक भैयालाल राजवाड़े विशेष अतिथि के रूप म मौजूद रिहीन।

मुख्यमंत्री-सियान सम्मान समारोह

अंतर्राष्ट्रीय वृद्धजन दिवस के मउका म सूरजपुर म राखे गे राज्य स्तरीय सियान सम्मान कार्यक्रम म आज मुख्यमंत्री विष्णुदेव साय सामिल होइन। ए मउका म ओमन ह ग्राम पंचायत शिवनंदनपुर ल नगर पंचायत के दर्जा दे जाय के, बिहारपुर गांव म सहकारी बैंक के साखा खोले के, पहाड़गांव ल पर्यटन के दर्जा दे जाय के अउ सूरजपुर जिला अस्पताल म सीटी स्कैन के व्यवस्था सुरू करे जाय जइसन कतकोन घोसना करीन। कार्यक्रम म मुख्यमंत्री ह सूरजपुर जिला म एक सौ सत्यासी करोड़ रुपिया ले जादा के लागत के आने-आने विकास काम के भूमिपूजन अउ सिलान्यास करीन। कार्यक्रम म ओमन ह समाज कल्याण विभाग के तहत हितग्राही मन ल श्रवण यंत्र, व्हीलचेयर, छड़ी अउ ट्राइपॉड वाले छड़ी बांटीन।

माओवादी-गिरफ्तार

बीजापुर जिला म सुरक्षा बल ह पांच झिन माओवादी मन ल गिरफ्तार करे हे। इंखर मन तीर ले टिफिन बम कार्डेक्स वायर, विस्फोटक अउ प्रतिबंधित माओवादी सामग्री बरामद करे गेहे। जिला पुलिस बल अउ डीआरजी के संयुक्त टीम ह गश्त के दउरान ए माओवादी मन ल गंगालूर-जांगला ले गिरफ्तार करीन हे।

राष्ट्रीय पोषण माह

राष्ट्रीय पोषण माह के तहत एक ले तीस सितंबर तक कराय गे जागरूकता कार्यक्रम म छत्तीसगढ़ ल देशभर म तीसरा स्थान मिले हे। पोषण माह के दउरान प्रदेशभर म एक करोड़ तैंतीस लाख ले जादा कार्यक्रम कराय गीस। उहें, वजन तिहार के दउरान तेईस लाख लइका मनके वजन मापे गीस। संगेसंग पोषण भी पढाई भी अभियान के तहत आंगनबाड़ी केन्द्र लोगन ल पौष्टिक आहार अउ स्वस्थ जीवनशैली के जानकारी दे गीस।

पोषण माह के दउरान मुख्यमंत्री विष्णुदेव साय संघरा दूसर मंत्री, सांसद विधायक अउ जनप्रतिनिधि मन ह आने-आने कार्यक्रम के माध्यम ले लोगन ल सहभागिता करे के अपील करे रिहीन। पोषण माह के गतिविधि म माईलोगिन अउ लइका मन ल पोषण बर जागरूक करे म पंचायती राज संस्थान के प्रतिनिधि, महिला स्व-सहायता समूह, प्रबुद्ध नागरिक, विद्यार्थी अउ स्थानीय लोगन के सहयोग मिलीस, जेखर सेती छत्तीसगढ़ ल ए सफलता मिलीस।

उहें, केन्द्रीय संचार ब्यूरो के प्रादेशिक कार्यालय रईपुर डहार ले राष्ट्रीय पोषण माह के तहत डॉक्टर राधाबाई शासकीय नवीन कन्या महाविद्यालय म राखे गे दू दिवसीय चित्र प्रदर्शनी के समापन आज होइस। कारीकरम के दउरान चित्रकला, रंगोली अउ निबंध प्रतियोगिता कराय गीस। उहें, महिला अउ बाल विकास विभाग डहार ले लगाय गे स्टॉल म लोगन ल सुपोषण बर चलत योजना के जानकारी दे गीस।

एखर पहिली, काली रईपुर सांसद बृजमोहन अग्रवाल ह ए प्रदर्शनी के सुभारंभ करीन अउ महाविद्यालय ल पचास लाख रुपिया के अनुदान रासि दे जाय के घोषणा करीन।

स्वच्छता ही सेवा

स्वच्छता ही सेवा अभियान के तहत उपमुख्यमंत्री अरूण साव आज रईपुर के जे.आर.दानी स्कूल म राखे गे "स्वच्छता की पाठशाला-सह-सफाई मित्र सुरक्षा" शिविर म सामिल होइन। ए मउका म ओमन ह लइका मन ल सफाई राखे के सपथ देवइन अउ स्वच्छताकर्मी मन ल सासन के योजना के फायदा देवाय बर आने-आने विभाग डहार ले बने सिविर के जायजा घलोक लीन। श्री साव ह "स्वच्छता ही सेवा" पखवाड़ा के दउरान राखे गे आने-आने प्रतियोगिता के जीतइया लइका मन ल प्रमाण पत्र बांटीन अउ सफाई कर्मी मन ल किट घलो बांटीन। सिविर म श्री साव ह किहीन कि स्वच्छता अभियान ह पाछु दस बछर म जनआंदोलन के रूप ले ले हवय। ए दउरान राखे गे सिविर म लोगन के स्वास्थ्य जांच घलो करे गीस। कारीकरम म सांसद बृजमोहन अग्रवाल अउ विधायक पुरंदर मिश्रा घलो सामिल होइन।

खेल अउ युवा कल्याण विभाग डहार ले काली रईपुर के रोहिणीपुरम तालाब के तीर म स्वच्छता अभियान चलाय गीस। ए दउरान खेल अउ युवा कल्याण मंत्री टंकराम वर्मा ह लोगन ल स्वच्छता के सपथ देवइन। सपथ लेके बाद मंत्री संघरा खिलाड़ी, नेहरू युवा केन्द्र संगठन के वॉलेटियर्स, अधिकारी-कर्मचारी अउ स्थानीय लोगन मन ह साफ-सफाई करीन।

ओति, जगदलपुर के धरमपुरा के क्रीडा परिसर म राखे गे जिला स्तरीय कार्यक्रम म सांसद महेश कश्यप सामिल होइन अउ स्वच्छता के सपथ देवइन। ए दउरान क्रीडा परिसर अउ कन्या पॉजिटिविक परिसर के साफ-सफाई करे गीस अउ विद्यार्थी मन मानव श्रृंखला बनाके स्वच्छता के संदेस दीन।

ट्रायबल यूथ हॉस्टल-सीट वृद्धि

राज्य सरकार के वित्त विभाग ह युवा उत्थान योजना म नई दिल्ली के ट्राइबल यूथ हॉस्टल म एक सौ पैंतीस सीट बढ़ाय के प्रस्ताव ल मंजूरी दे देहे। ए योजना म प्रदेश के अनुसूचित जाति, अनुसूचित जनजाति अउ अन्य पिछड़ा वर्ग के युवा मन ल दिल्ली म निःशुल्क यूपीएससी कोचिंग के सुविधा दे जाथे। उंखर मनके रहे के, खाय के अउ पढ़ई के खरचा ल घलो राज्य सरकार उठाथे। पहिली ट्राइबल यूथ हॉस्टल म पचास नया अउ पन्द्रह रिपिट बैच ल कोचिंग के सुविधा मिलत रिहीस। अब ए योजना म एक सौ पैंतीस ठिन सीट बढ़ाय के बाद दू सौ युवा मन ल आवासीय सुविधा मिलही।

मंत्रिमंडलीय उप समिति-बैठक

खाद्य मंत्री दयाल दास बघेल के अध्यक्षता म काली मंत्रालय म अवइया खरीफ विपणन बछर म समर्थन मूल्य म धान खरीदी अउ कस्टम मिलिंग के नीति के समीक्षा करके सुझाव दे बर बने मंत्रिमंडलीय उप समिति के बइठका होइस। जेमा एक सौ साठ लाख मीटरिक टन धान खरीदी के लक्ष्य राखे गीस। उहें, किसान मन ले इक्कीस कुंटल प्रति एकड़ के मान ले धान खरीदी करे के फइसला ले गीस। बइठका म दीवाली अउ राज्योत्सव ल ध्यान म राखत धान खरीदी पन्द्रह नवंबर ले सुरू करे जाय के बारे म चर्चा करे गीस।

